

南

廂

志

南廳志卷第二十二

列傳四

詹同

吳琳

吳彤附

李叔正

杜環

蘇伯衡

朱夢炎

貝瓊

趙倅

蕭執

曾旦初

張美和

吳伯宗

聶鉉

詹同名書字同文後以字行徽州婺源人四世祖青始以武弁起家扈從宋高宗南渡官至武德大夫殿前統制其後籍與編氓伍曰安知吾子孫不有以文學興者乎至鼎生同文年十二三從鄉先生學有俊聲時元學士虞集第

槃爲蒼梧尹見而奇之妻之以子授易於甘楚材學春秋於劉彭壽二人皆當世名儒以經術名世而同文天資俊爽見趣卓絕能盡造其闢奧至正中舉茂才異等爲郴州學正遇亂寓黃州仕陳氏因占籍武昌甲辰王師下武昌遂來歸

上厚待之暇則與之講論經史同文占對不窮上益加禮重及還京師除博士屬中書省已而集功臣胄子於

內府命同文教之更其官爲國子博士其僚友治

一經者猶不能盡通同文乃能淹貫羣籍隨叩而鳴毋講易與春秋尤獨超詣聽者豁然賦性爽敏涵揉濬發為文操筆立就水湧山立可喜可愕時與

上同遊每應制有作

大駕幸鍾山同應制詩大駕幸

花如雨三千界紫氣成龍五百年風送香煙浮
袞服池涵樹影拂青天詞臣侍從何多幸安得
詩才似湧泉他
作類此不盡錄

上未嘗不稱善也歷遷考功郎中起居注翰林待制
洪武元年轉直學士始

賜名同更以同文為字嘗訂正音樂進所訂釋奠

樂章下太常用之二年遷侍讀學士四年陞吏部尚書六年爲學士承旨仍兼吏部尚書甄別人倫鋪張神藻爲朝野所推服後致仕卒同操行耿介始終清白所著有海天集天衢吟嘯集其子徽仕至左都御史兼吏部尚書父子世爲冢宰亦薦紳盛事也

吳琳黃州黃岡人世爲詩禮名家父應澍勤儉好施教於其鄉號西山先生琳性資純篤力於問學通毛詩小戴記王師平陳友諒

上方徵用荆楚名儒詹同薦琳通經學古且能文章

遂

召爲國子助教與同竝教胄子才藻瓌麗琳固讓
同至於商確經義疊疊不倦則琳所長也每遇
上聽政之暇有所咨詢輒進嘉言天下陰受其賜後
遷浙江按察司僉事克振風紀及貳鹺臺國課
以辦已而入爲起居注獻納益勤進兵部尚書
方試京闈髦士有司以主文請

上思琳優於經學遂命琳與司業宋濂柄其事及撤
棘衆謂得人洪武六年改吏部尚書錫之

誥命有學術旣醇踐履尤正之褒與詹同迭視部

事琳尋以老致仕旣家居

朝廷嘗遣使祭之使者潛至其旁舍見一農人孤坐小几起而拔稻秧徐布於田貌甚端謹使者乃問曰此有吳尚書者在家否乎農人斂手對曰琳是也使還以其狀聞

上益重之時又有吳彤文明者臨川人元至正丁亥進士亦以文學聞乙巳秋七月拜國子博士成均初設其建立規制及銓選祠祭之事彤皆與焉丙午正月轉同知嚴州府事後終北平按察副使

李叔正初名宗願字克正南昌靖安人其先唐
宗室世家四會至殿中侍御史翰林學士積中
始家南昌叔正生而聰穎善記年十二以能詩
聞人以神童呼之既長博通諸子百家之言江
西十才子叔正其一也方陳友諒陷南昌時妻
夏氏投井死叔正終身不再娶歲丙午初設國
子學有以宗願名薦者擢爲學正洪武三年告
歸田里許之既退自齒於齊民已而廷臣以太
學舊條文行兼備無若叔正者登名薦剡誤以
克正爲叔正四年徵至京師仍除國子學正遷

渭南縣丞時同州人與蒲城人爭地連年不決
行省以是事委之叔正卽單騎至其處召二家
至前立談而決縣歲輸糧二萬而田無定額乃
責里社丈量立法密而用刑嚴奸慝慙服畢獻
其誠於是豪右失計公私交便遷興化知縣尋
召爲禮部員外郎年老乞骸骨不許除國子學助
教叔正凡三至太學至是日與諸生講解立課
程而督勉之雖貴胄待之愈嚴旦夕端坐聽察
誦習無倦容暇輒會計廩饌毫髮無敢欺者
朝論推讓其賢能遂遷監察御史嘗奉

命巡嶺表因適瓊州府吏訐告其守進表公座僉名鞫之抵吏罪而守之誣得直

上聞而大悅獎諭之曰人言老御史懦乃明斷如是邪連擢湖廣叅政陞布政使

召還爲禮部侍郎十四年陞本部尚書卒年六十

四

杜環字叔循金陵人其先本廬陵人侍父一元遊宦江東遂家焉一元好交四方名士多哀其詞翰以教環以是環博通經史長於翰墨其書法端妍至於行草亦各臻妙歲丙午太學初建

環以儒士被薦除學錄以其書法示六館之士
皆倣而式之尋入侍春坊大為

皇太子所眷時天下以工書名者皆被徵而至然
流輩中罕見其比焉故環之書名騰京師學士
大夫有所述作借其書以取重洪武改元遷太
常將禮郎後為

晉王府錄事終太常寺丞為人謹飭重然諾好周
人急父友兵部主事常允恭死於九江其母張
氏年六十餘哭九江城下無所歸有識允恭者
憐其老告之曰安慶寺譚敬先非允恭友乎盍

往依之母如其言附舟詣譚譚謝不納母大困
念允恭嘗仕金陵親戚交友或有存者庶萬一
可冀復哀泣隨人至金陵因訪一元家所在遣
上人對以一元已死惟子環存其家直驚洲坊
中門外有雙橘可辨識識母服破衣雨行至環家
環方對客坐見母大驚頗若嘗見其面者因問
曰母非常夫人乎何為而至於此母泣告以故
環亦泣扶就坐拜之復呼妻子出拜妻馬氏解
衣更母濕衣奉糜食母抱衾寢母母問其平生
所親厚故人及幼子伯章環知故無在者不足

又不知伯章存亡姑慰之曰天方雨雨止爲母
訪之苟無人事母環雖貧獨不能奉母乎且環
父與允恭交好如兄弟今母貧困不歸他人而
歸環家此二父導之也願母無他思時兵後歲
饑民骨肉不相保母見環家貧雨止堅欲出問
他故人環令媵女從其行至無所遇而返坐乃
定環購布帛令妻爲製衣衾自環以下皆以母
事之母性褊急少不愜意輒詬怒環私戒家人
順其所爲勿以困故輕慢與較母有痰疾環親
爲烹藥進七筋以母故不敢大聲語越十年環

以贊禮郎奉

詔祠會稽還道嘉興逢其子伯章泣謂之曰太夫人在環家日夜念少子成疾不可不早往見伯章若無所聞第曰吾亦知之但道遠不能至耳環歸半歲伯章來是日環初度母見少子相持大哭環家人以爲不祥止之環曰此人情也何不祥之有旣而伯章見母老恐不能行竟給以他事辭去不復顧環奉母彌謹然母愈念伯章疾頓加後三年遂卒將死舉手向環曰吾累杜君吾累杜君願杜君子孫咸如杜君言終而絕

環殯而葬之歲時常祭其墓學士宋濂爲環傳其事云

蘇伯衡字平仲浙江金華人其先本眉州九世祖宋尚書僕射文定公轍轍長子徽猷閣待制工部侍郎遲守金華因家焉伯衡少警敏絕倫誦說不勞而習中歲大肆力於文詞精博敷腴人謂有祖風致元末舉鄉貢進士入

國朝歲丙午選爲國子學錄尋陞學正屹然以師道自任凡公侯卿大夫之子弟無不恭肅奉教莫之敢後嘗因公試發策試士皆天下國家大

務於國學公試策題八首其一問為人君者莫貴
漢官之勤莫大於斷莫難於信其臣周文之日晏
勤也而或治或亂不同焉晉武之平吳憲宗之
取蔡符堅之南伐宋文之北討同為能斷也而
或興或亡不同焉秦穆之於孟明漢昭之於霍
光燕會之於子之德宗之於盧杞同為能信其
臣也而或安或危不同焉學諸之論事惟其未
至之理難為說而抵其已往之迹易為言請陳
此十二君者其始何得何失而改其所以後效相
備請問之及襲其所以成而改其所以敗庶有
取也其二問能稼而能穡斯之謂良農能獲而
能烹斯之謂善獵能開邊而能安邊斯之謂
於為國故漢收河北兵不再興唐收河隴未嘗
出師今西蕃朔漠之地秦漢唐宋之所不能自
者我國家談笑而悉取之矣伊欲使戎狄賓
服不敢南向而牧馬洮隴幽薊之民目不覩旗
旄耳不聞鉦鼓而安於耕鑿必有良策二三子
其悉陳之其三問井田也學校也禮樂也此王
政之大者也為法雖不同而先後常相資顧淵

問爲邦而孔子則以四代之禮樂語之滕文問
爲國而孟子則以三代之力田學校告之然則
此數者果可偏廢歟夫爲治未有不本於古而
可行於今者也孔孟之所言布在方冊其施設
之次第願推言之以聞于上其四問義和
之典曆后夔之典樂皋陶之典刑益之典鳥獸
棄之典稼穡皆守一職終其身焉近世仕者一
人之身而兼數官者有一歲之內而歷諸司
者有之豈將其人皆賢於古人而措諸事業者無
施不可歟將徒知計班資之崇卑而耻於效一
官歟抑拘於數易之制而甘有不得盡歟夫唐
虞之時洪水方大天下可謂多事而當其時事
無不治今四方大定非有難治之政而當世之
務往往廢滯夫安其分而專其智能於一職與
夫急於進取而無常職其得失亦可見矣居今
之世而欲復古之道如之何其可也其五問常
衮之居相位也選舉不自專一命以上皆付之
定法可謂盡公無私矣而賢愚有同歸之議崔
貽孫之居相位也未一年除吏入百多其親舊
可謂出乎法制之外矣而當時有得人之稱後

世宰相以常為法乎則涉于避嫌以崔為法乎
則近于專權專權致威福下移之謗趙嫌失竭
誠狗國之義而謂賢相為之乎夫古之賢相就
有加於伊尹傳說周公召公者乎伊尹則數不
哲人以傳說則旁招俊乂周召則明揚俊民既不
自以為嫌而其君亦不以為疑是果何道歟為
相不可數請為之說其六問在朝言朝之問抑果可
在學校言學校之說其六問在朝言朝之問抑果可
夔成周國子之教總之于樂正則樂豈非尤學
士之所當重歟後世何以希闕而弗講歟古者
興師其出也受成于學其返也獻俘獻馘于學
則兵豈非亦學士之所當知歟後世何以是諱
而弗談歟所言者無非天人性命之理而指六
藝為器之末所習者無過記誦詞章之間而視
六德六行為空言後世之學校果三代之學校
歟夫何能健城關則其習至于今而尚存成材
就實則其人質諸古而有踈歟然六館三學之
令而存其教養之法已踈歟然六館三學之士
或叩閣上書而挽留先生或倡明大義而不汙

借僞或指斥權臣而竄責不恤亦嘗見之而君子以爲盛事果何以致之歟其豈所謂不待文王而興者歟國家建首善之地於京師二三子游焉息焉豈惟稽往行以自鑒擇善者以自從而已凡古法之當施于今與今日之所當務者極陳之以修舉闕陋使教道興而人材盛亦有司之望也其七問穀爲六府之一農居八政之首是故爲國先務未有先於訓農者也今天子每歲仲春躬耕籍田以率天下之民郡縣之長吏皆兼勸農之職重農亦云至矣是宜事之本業之徒多干逐末之作之輩也而田里之間地有遺力而多遊手何歟將盡驅之緣南畝歟則井地之法未易復限田之制不可行何以給之不爲之禁歟則國家之調度一切取贍於有田之家不能無腴劑之病而操奇贏者顧安享厚利將見背本而趨末者滋衆品調消息之使農民無所傷而遊民無所利其古道何由可得而聞之乎其八問尚書曰事不師古匪說攸聞周書曰不于古訓于何其訓是師古匪說攸聞周下其損益者有之而所因者猶一夏商周之有天

謂質文有改制之名而無變道之實者是也自
秦人廢古而先王維持天下之大經大法蕩然
無復存焉者矣漢興撥拾於煨燼之餘其豈無
一二爲先王之舊然自秦迄千五六百年時君
出主初未嘗諄諄然取法之爲務也而不害其
爲有天下有天下而最盛者莫過漢唐漢之法
大抵襲秦唐之政一切因隋而其制則皆幾平
三王乃若新莽之復非田字文周之復六官可
謂篤于師古者矣而無救于其昏亂敗已何秦
隋之制可以傳遠而先王之法度顧不可以垂
憲哉夫豈高帝之大度文帝之仁厚宣帝之精
精大矣宗之英武乃致治之資而莽之惡宇文
庸固自有取亡之道歟將善復古者貴求其實
而不責慕其名在得其意而不在泥其迹歟不
然豈所謂出殊事異不相沿襲者不誣品第精
而商周之書乃虛言歟幸推明其故

數多士翕服由是駸駸向學成均多博古通今
之士矣嘗著瞽說四十首學者皆傳誦之其論

上位而受教則閑然不屑而人且以爲辱不中
者終於不中不材者終於不材不賢者不至於
賢賢者不至於聖不知卑賤者耻教人之過邪
不知尊貴者耻教於人之心曰心何以其二中
空同子曰學何務曰治心曰心何以其二中
曰有道乎曰有曰道何如曰少思寡欲主敬少
思則靜寡欲則明主敬則一靜其本也明其體
也一其要也今夫水其不撓則一不撓者其不
之撓若苟一撓一不撓者其不撓者其不撓者
也必於其不撓者焉苟自不撓者其不撓者其
以靜爲本矣今夫鏡其一塵翳之而其一塵不
之繫若苟一翳一不翳者其不翳者其不翳者
也必於其不翳者焉苟自不翳者其不翳者其
是以明爲體矣今夫路其東多岐而其西無岐
則收豎過之而亡其羊也必於其岐多者焉苟
自其岐多者亡其羊則是以一爲要矣一故靜
故明靜明一學之務畢矣是故少思未遽靜也
少思則靜明一學之務畢矣是故少思未遽靜
寡欲則情不勝而無欲可至焉主敬未遽明也
主敬則有主而無貳可至焉無思則靜矣無欲

則明矣無貳則一矣而學之務畢矣故曰其道
在少思寡欲主敬此非余言也無民之訓也力
行則存教胄子者五年近臣有薦其才於

上者卽日召見親擢爲翰林國史院編修伯衡詣承
相府辭曰禁林地望親切日侍

天子左右備顧問至華要也伯衡不幸幼有瞶疾雖
龜通文史然大懼奏對失措將速刑僇誠不足
以堪之敢辭丞相以聞

上亦弗之強已而吏部將別奏官之伯衡念去親日
久願歸省覲復走白丞相許之於是司業宋濂
率六館之士祖餞於龍江謂曰文定公古史一

書至今傳之資治通鑑尚闕宋元平仲歸矣其
尚續諸他日使人稱曰蘇氏一門世濟其美將
不在茲乎伯衡謝曰方抱疾未能也歸治一室
常靜坐其中或終月不出與人少所傾接人亦
罕得而識之所與遊者皆四方名士非其人雖
未嘗拒絕然自不敢見也洪武十年宋濂以學
士承旨請老歸旣入謝

上問曰今在外文學復有如卿者乎其舉以自代濂
曰伯衡臣鄉人也博學飾行爲文辭蔚瞻有法
要不可以微疾廢

上許而亟徵之於是承

召至京師甫就舍館自宰執以下咸躬禮往候詢
及輒以疾對其語如辭編修時明日入見

奉天門

上屬目久之旣退問羣臣皆述其所對以聞

上然之賜官段表裏各一寶鈔十錠乃遣歸二十一
年會試復徵聘伯衡爲考試官事竣復辭歸竟
以壽終伯衡爲人情靜寡欲年四十始娶容貌
不逾中人而學問可以兼天下平居正襟凝思
淵止山立雖寒暑風雨利欲紛華亦皆不之知

故能覃精於義理名物典故事爲之要發爲文
詞俄頃數千言所著有文集六卷宋濂劉基序
之以傳於世

朱夢炎字仲雅南昌進賢人其先本袁氏以妹
之子繼兄後祖粹中宋末漕貢進士夢炎少孤
粹中訓之學成登元至正辛卯進士爲撫州金
谿丞歲丙午以故官入京延居上賓館

命與儒士熊鼎等集古之忠良奸邪事實以恒辭
直解之爲公子書及務農技藝商賈書使貴賤
之家講誦通知大義書旣成有白金及衣帽鞞

韞之賜俄除國子博士俾領胄子教之夢炎日以所爲書訓迪諸生兼使讀誦經書無有弗率教者

上時召問夢炎奏對詳雅應制作爲文章皆典則有據

上益重之吳元年遷翰林修撰坐小誤出爲浙江按察司經歷洪武二年轉山西行省員外郎是年入爲禮部員外郎尋陞侍郎十一年四月陞本部尚書夢炎博學善記通歷代文獻之學如指諸掌

朝廷稽古議禮審樂皆有力焉

貝瓊字廷臣嘉興崇德人性坦率不事邊幅而
篤志好學博通經史百家之言善爲文年四十
八始領鄉薦張士誠據姑蘇累徵不就洪武三
年被薦修元史旣成編受賞而歸六年以儒士
舉至京師除國子助教嘗慨古樂不作所謂成
均徒有其名廼作大韶賦以見志賦曰有東吳
公于北走齊
魯之疆觀于嶧山而見孔林主人焉主人曰公
子之遊亦將有所觀乎曰無也生于震澤三鄉
之僻陋寡聞竊慕禮樂之事而六律七均之制
嘗究心久矣願有請于大人先生焉主人曰嘻
吳會東南之天府而天下之善音萃焉而公子
猶有所未足者豈將厭淡薄而說鏗鏘乎必將

按陳姚携趙女摩頭絃考麗鼓若是以爲樂乎
公子慙然不悅曰霓裳之曲唐之所以播越也
廣陵之散晉之所以分裂也故不足言矣若此
者又夷狄之樂無異紂之靡靡以亡其國者豈
若之所樂乎顧聞其他主人曰七德之歌七德
之舞太宗之肇王業也亦嘗聞之曰伯耆之事
子孫無所法焉曰漢祖躡蹠贏龍飛沛中置酒
臺悲歌大風造基四伯光啓西東若是何如公
子曰猶有伯心之存也駁而未純然猶一世之
雄乎請言其上主人曰抑聞武之六成乎武之
濟河而西也馬散弗乘牛散弗服側載干戈已
以虎皮天下知其寢兵不用也爰作武以象功
焉鼓以戒衆久然後戰也長歌連延起其慕也
發揚蹈厲時不可失也故一成北出再成滅商
三成自北而南四成南國是疆五成分左右以
居周召六成復始而爲天下王振鐸夾舞秉戈
鷹揚若是何如公子曰其容美矣此武事也未
盡善也請言其上主人曰其惟舜之大韶乎當
夫六府治三事和叙九功形九歌嶧陽之桐可
以琢琴瑟焉雲夢之篠可以竅管箛焉

石可以礪而爲器焉荆山之金可以範而爲鑑
焉入音既具而大體短脰之屬有力而不能徒
者以之爲鍾簴焉小體騫腹聲清而遠聞者以
之爲磬簴焉其作也控以合之其終也揭以止
之洪者鏗而充清者磬而介凄切而不流泛焉
而可會當夫朝廷之燕享宗廟之祭祀於是而
奏焉升歌在上匏竹在下代作間奏秩秩有序
或擊或戛或拊或搏清亮而高遠象乎天之渾
渾渾渾而合容乎地之磅礴一變一通兮四
時之始終一散一潤兮風雨之回合是時也熙
熙然八荒一春皞皞乎洪荒大朴格三苗於洞
庭丹朱賓而有恪俯而取之純如辛甘之相濟
繳如有倫而莫錯詘如斷王之復續釋如鑿珠
之碎落飛流合而萬壑雷轉清風生而天籟交
作吟九困之老龍吟九臯之玄鶴既么妙而悠
揚亦和平而詹泊無隱微以感其憂無慢易以
感其樂其動於物也客何爲而肅若神何爲而
來思歟何爲而舞於上階鳳何爲而翔於茅茨
明協乎太章博擬乎咸池所以保無窮之治以
示安而不忘乎危也悼六龍之南巡歷蒼梧而

上九疑阿母之玉琯猶在湘靈之錦瑟空悲悵
遺聲之寂寂叫有虞兮遠而然而齊之有韶陳
亡而流於茲也海外之有韶聖人之化播於蠻
夷也宜季札觀之而忘德仲尼學之而忘味彼
武之六極於陰特著其武功如此詔之九極於陽
寔昭其文治也公子以爲何如公子乃避席而
謝曰至矣盡矣不可以有加矣主人曰未也請
授以九德之歌其一洪流橫曰玄黃判風氣開
洪流橫民乃災五行汨帝爲哀禹治之啓始殄
决九川平九垓百穀主田每爲其二洪流殺曰
洪流殺兮民災既除山有鳥獸兮川有魚爰可
食兮可居胥樂且歌兮母忘厥初其三苗格
曰惟聖皇聰撫有九圍蠢蠢三苗險阻是依出
師於南奮我帝威我師既還苗亦來歸其四四
凶黜曰德與刑兮國之經四凶斥焉八元在庭
帝無爲四海寧其五正德之歌曰惟天降命物
必有則民之普普胡乃自賊五教不行禽獸夷
狄聖人龍飛四方之極其六利用之歌曰水既
平兮別九州下爲隰兮高爲丘徒則軒兮涉則
舟以美濟乏兮百貨流財孔阜樂且無憂其七

厚生之歌曰下民孔艱兮遭此溺寒我衣兮
我食我母民違兮父母職其八鳳凰來儀曰
不德兮舜不辭授以天下萬物治寒暑無易風
雨時蕭韶九奏朱鳳儀其九萬世賴曰天覆地
載高廣莫測孰衆贊是俾衣而食帝治天下如
埏如埴萬世賴之安知其力公子曰嗚呼禮廢
樂崩幾千秋矣而始聞主人之宏論乃復爲之
歌曰雅南已亡兮流盪曷止威栗雷怒兮空桑
無聲綠綺不陳兮薦檀槽與箏箏妖倡爲妍兮
鸞鵲而啼燕鶯孰究夫大韶之盡善盡美兮
寔熒夫六英六莖後千載之聖人兮集厥大初
成安得聞九奏於清都兮御天風而上征
宋濂之爲司業也建議於

朝謂當立五學並祀舜禹湯文爲先聖

高皇帝不用其說且黜辱之然士大夫猶有避濂者

瓊乃作釋奠解解曰三皇何人也曰古聖人也
曰其爲聖人也李何曰庖羲氏

開天下之文神農氏典天下之利黃帝制器尚
象以通天下之變此為治者莫過於三皇也何
如曰孔子不得如三皇修君師之職於是刪詩
書正禮樂贊周易修春秋以明綱常於萬世德
雖同而事則殊矣然則祀三皇於學以孔子配
之可乎曰不可以三皇為先聖以孔子為先師
奚為不可也曰又各有所當也按周禮有道有
德者使教焉死則以為樂祖祭於瞽宗故文王
世子篇曰凡學春官釋奠於其先師秋冬亦如
之若禮有高堂生樂有制氏詩有毛公書有伏
生皆先師之類也又凡始立學者皆釋奠於先
聖先師釋者曰先聖若周公孔子其下云凡釋
奠者必有合也有國故則否蓋謂國無先聖先
師則所釋奠者當與鄰國合若唐虞有夔伯益
周有周公魯有孔子則各奠之不同也是唐虞
與周所上先聖先師固無定名未有及於三皇
也再稽之史漢魏之王取舍各異周孔迭為先
聖孔顏互為先師若周公制禮作樂宜享王者
之祀於是罷周公升孔子配以顏子高宗未嘗
中又復武德舊制顯慶二年以長孫無忌言正

孔子爲先聖仍以周公配武王歷宋迄今釋奠
孔子定爲不易之典是唐宋所主先聖先師已
有定名未有及於三王也嗚呼太古以來人若
禽獸然寒無裘暑無葛襪無木食渴無谷飲無
五穀以爲養也疾病相仇無醫藥以濟其天死
所夷或巢或穴無上棟下宇之禦風雨川游陸
走無舟車之安也其事簡其俗淳結繩而治無
文字之可紀也三皇繼作而後人之爲道始備
此衆人疑其不祀三皇者夫三皇宜祀而不得
祀之於學也惟孔子當周之不振憂道之失也
與諸子講於洙泗之間以述三皇之所傳故宰
我曰以子觀於夫子賢於堯舜遠矣冉有曰自
有生民以來未有盛於孔子者也孟子曰孔子
之所謂集大成也者金聲而玉振之也宜爲百
王之宗主萬世之所法所以祀之於學也學始
無孔子廟惟魯有廟然其教被於天下非一國
所得專者故天下通祀之自唐已然虞世南韓
柳諸記可考矣學之有廟由孔子而建則宜以
孔子爲先聖顏子爲先師而三皇不預也盛矣
哉孔子之道中國尊之夷狄尊之僑以文宣王

門列二十四戟冠十二旒服十二章執鎮奎龜
然南面而坐祭則牲太牢樂大成舞八佾于庭
其所以尊孔子者又豈以是爲加歟不如是不
能稱其德周太祖屈萬乘過闕里拜其像又拜
其墓視漢之高帝明帝尤重其禮論者亦不以
爲過是貞觀之制出於天下之公而非一人之
私見閱萬世不可易者今欲崇三皇爲先聖使
居孔子之上不足以褒其功降孔子爲先師使
混於高堂生之列適所以貶其德故吾的然以
爲不可也或又曰古者祀舜於虞庠祀禹於夏
學祀湯於殷學祀文王於周學舜禹湯文得以
祀于學而不得祀三皇何拘於貞觀之制耶曰
王天下立四代故祀舜湯文而三皇將祀之於
何學歟或進曰先生之言詳三皇孔子其道一
也崇孔子之祀當崇三皇之祀焉以佛氏之苦
空寂滅老氏之荒唐怪誕無益於人與國且崇
臺廣殿擬於王宮法亦弗之禁矧三皇之功及
於人者如此而領之於醫不亦褻乎曰領之於
醫特主神農嘗藥之一事理固有未盡者宜定
其制設官主之以豐其祀可也祀之於學則非

義矣時余爲國子助教適聞有以邪說言於
朝破貞觀之制者既片而不用矣余懼其惑人
也故其特正論類此九年遷中都國子助教教
勳臣子弟瓊爲人文行超越素有名譽雖將校
武夫皆知禮重十一年九月致仕明年卒於家
有清江文集二十卷行於世

趙俶字本初紹興山陰人博通經史爲文道健
名重當時尤明於毛詩洪武六年春被薦至京
高皇帝召與講論經史俶援據傳說貫穿古今每奏
對

上輒稱善除國子博士既教胄子隨扣輒應莫不樂

得經師

上一日御奉天殿俶偕諸儒侍側召至前諭之曰經學必宗孔子毋以儀秦縱橫語示諸生也俶頓首謝歸而告誡士子屏去戰國策諸書勿讀自是傳經者文日益醇明年

詔擇諸生之聰悟能文者三十五人命俶領而顯教之且令修詞以漢司馬遷班固唐韓愈宋歐陽修蘇軾爲法尋於諸生中擢李擴黃義等入文華武英二堂說書多至大用俶自專師席旦夕誨迪不倦士多成業丙辰十一月乙未陳情

乞骸骨丙申

上御奉天門御史臺左大夫汪廣洋右大夫陳寧奏
曰博士趙俶以詩經施教成均者四年其弟子
爲方岳重臣及持節各部者往往有之是不爲
無功但今年逾七十筋力寢衰精神不完願
陛下放歸山中以盡其餘齡

上可其奏加俶官爲翰林院待制勅吏部給以誥命
致仕戊戌俶詣闕謝

上召之使前問曰卿何郡

對曰會稽

上曰向爲兵部侍郎出知

卿之子邪對曰是也

上因絳視之曰卿誠耄矣歸養於家爲宜俶頓首而
退初俶子圭玉官法從時俶作訓忠之書教之
圭玉由是服政有盛名世以俶爲愛而能誨越
七日甲辰

詔出內藏庫錢二十五緡以賜俶拜謝遂行廣洋
及寧皆賦詩贈俶和者成什司業樂韶鳳授簡
學士宋濂爲序率同官暨諸生千餘人送之都
門聚觀莫不美其榮遇云俶後考終於家年八
十一

蕭執字子所一名雅言吉安泰和人世爲儒家

祖夢得有文行嘗廬墓三年以毛詩訓其鄉人
執博學強識結廬讀書於武山以家學領洪武
辛亥鄉薦上第選爲國子學錄令分教公侯卿
大夫子弟每因其材質與之講解多所造就執
蓄學日富尤長於詩洪武五年五月戊午夏至
上將有事於北郊前期丁巳大雨初止

駕詣齋宮中官奉

旨召兵部尚書吳琳禮部主事宋濂率文學能賦之
士從焉於是執偕禮部尚書陶凱工部尚書黃
肅翰林應奉張壽等十二人趨出所居齋廬遵

輦道傍逕趨入齋殿以見時

上新服緇常紗巾神慮閒適顧謂曰今茲祀事是將
天宇澄霽克厭朕心爾等以文職陪祀宜卽時
物所有賦詠以來因命賦殿下柳榆併荷露退
而詩成以次呈獻

上親覽誦之品第有差焉旣而復命中官傳

旨令賦詩者往殿後觀柁子花人給紙一俾各賦詩
詩旣成序進如初執最在後

上閱其詩喜動於色因命起居注劉季道出諸詩令
在侍者徧觀之執班列最遠則又召使前焉其

爲

上所寵睞如此贊教既三年念其親且老慨然力丐

歸侍凡三四上乃得請親歸泰和片天下之善

惟孝與忠是謂秉彝萬古攸同綱惟成均首善

之地風動四方罔不從化其居是職者其有不

惕然日省者乎昔陽城之爲司業也立諸生館

下而誨之曰人之爲學忠與孝耳諸生有久不

省視者乎明日謂城還養者二十人諸生且爾

況爲其師者苟鶴髮之親在堂其心又將何如

乎此余於西昌蕭君之事不能忘言也蕭君名

執字子所居武山之西山形拔起如旌旗浩翠

淋漓積自古何土沃而泉腴蕭君朝樵於白雲

之岑暮而古旋買鮮於溪過濁醪於東鄰婆娑

庭舞親側奉觴上壽親既醉蕭君亦微醺扶手

歌曰武山崔有雲英英止武山如藍川流不

停止我來我親其樂莫與京止樂今樂今我衣

身焉會科目之興有司強赴江西秋闈名在前
列已而上南宮選授國子錄所授經皆公侯家
之子見蕭君能古文辭皆心服之業將成蕭君
獨有不豫色然人問其故輒潸然墮淚曰吾親
髮盡白矣臚氣下上不自寧矣武山夜鶴曉猿
遲余歸久矣於是走白丞相府其辭甚切吏拘
於文墨往來參稽閱一歲而始報可蕭君治行
李將歸激者曰蕭君之所見一試而歸今蕭君之
之才當用才之世何不一試而歸今蕭君之
官或拜御史或擢縣令矣使蕭君少忍須臾銅
章青綬豈不足榮其親哉贊善大夫宋濂曰是
惡足以知蕭君蕭君不忘孝於親豈有不忠於
君者乎想成均為首善之地故不敢冒爵祿以
失菽水之歡爾不然是有愧陽城之諸生矣尚
何足以言蕭君乎銅章青綬之榮子謂蕭君他
日不為之乎風者無以對於是出酒飲蕭君幸
同志賦詩一章成則蕭君為之欣然引滿頽然
就醉片帨西上抗手而別洪武六年六月二十
四日既歸鄉之子弟以其教太學有成也乃相率

關門修贄從之遊來者日衆於是里士蕭鵬舉
與蕭學文輩倡義爲建義塾且買汶溪之田以
資館穀廬陵王伯衢聞而避之競以山木穀粟
助其役相與落成之其道義孚於人者如此執
天性至孝旦夕不離親側親沒廬墓三年免喪
乃領邑教誘進後學孜孜不倦申國公鄧愈統
兵勦龍泉草寇將蔓連泰和執詣軍門陳禍亂
之由於是愈下令禁止玉石之焚有別邑人德
之禮部侍郎劉松序其詩集行於世序曰予友
學強識跌宕好遊而樂於取友遭世亂讀書什
竹山中凡時事之所有論議之所關遊覽之所

歷一寓於詩歌懷鉛挾槧行吟坐嘯終日屹屹
不少休其用心亦勤矣余嘗得其所賦讀之蓋
燦乎其有章鏗乎其有聲浩乎其有所本也豈
非能賦之士哉自東南禍變世之作詩者往往有
感於杜陵天寶以後之作而詩道一變矣竊嘗
以爲世變萬情性一故其於詩也未嘗無所
法而拘之以則卑矣未嘗無所自而襲之以則陋矣
耳況汎以爲易毋棘棘以爲奇也充之以學養
之以氣約之於所守達之於所施則天下之事
可從而理矣況於詩乎余方有志斯道思求能
賦之士以相長發焉若雅言者固余
之所願也輒因其詩而爲之一言

曾旦初名旭以字行撫州臨川人洪武初以薦
爲國子助教旦初雅性溫克素以文行知名諸
生受教者多樂就之

朝廷以旦初老成知太常故實事多咨訪已而

召見問郊祀之禮凡所應對

高皇帝無不稱善者由是數承顧問擢禮部主事卒

其文集學士宋濂序之以傳於時序曰臨川曾

為文凡若干篇其門人某類編成書而以首簡請余序序曰天地之間萬物有條理而弗紊者莫非文而三綱九法尤為文之著者何也君臣父子之倫禮樂刑政之施大而開物成務小而從身繕性本末之相涵終始之交貫皆文之章章者也所以唐虞之時其文寓於欽天勸民明物察倫之具三代之際其文見於子正寅之異建貢助之具三代之際其文見於子正寅之異本既備而節文森然可觀傳有之於當世其大六經無文法無文森然可觀傳有之於當世其大文法者物理即文而非法之可拘也秦漢以下則大異於斯求文於竹帛之間而文之功用隱矣雖然此以文之至於者言之爾文之為用其亦溥博矣乎何以見之施之於朝廷則有詔誥冊

祝之文行之軍旅則有露布符檄之文託之國
史則有記表志傳之文他如序記銘箴贊頌歌
吟之屬發之於性情接之於事物隨其法纖稱
其美惡察其倫品之詳盡其彌綸之變如此者
要不可一日無也然亦豈易致哉必也本之於
至靜之中參之於欲動之際有弗養焉養之無
弗充也有弗審焉審之無弗精也然後嚴體裁
之正調律呂之和陰陽之化攝古今之事類
人之已之情著之篇翰辭旨皆無所畔背雖未
於至文之域而不愧於適用之文矣嗚呼文乎
其可易言矣乎今吾先生淹貫群經所謂三綱
九法其文理之粲然者加體索而擴充焉嘗以
春秋連貢於鄉科目既廢益寓意於古文辭用
功於動靜者久聲光燁然起士林中予取而讀
之藻火黼黻之一可以揮金聲玉振之迭奏魚龍波
濤之驚迅一可以適於世用信夫萬物各有
條理者於先生之文亦可以見之余在詞林方
助敎成均朝夕相與論文甚驩故因其門人所
請推原文之至者而為之序著
源委之真欲體用之兼舉也

張美和名九韶以字行江西清江人幼穎異年十三卽能詩詞博通經史元末累舉不第洪武三年用薦爲縣學教諭十年

召陞國子助教爲人篤實每教諸生必端坐不言有所請問徐徐應答不過一二語然義理明暢人深服之十一年遷翰林編修十三年四月戊子致仕

高皇帝親爲文賜之曰朕聞古之賢士莫不修己行仁爲時君之用否則獨善其身以終天年或著書立言傳之永久雖不顯於當時而有功於後

世以其德重而行純學博而言信也今老成宿
儒凋落無幾獨爾以衰暮之年日侍朕左右正
欲詢問古今典禮以沃朕心柰爾不任周旋所
以命卿歸老卿之去矣朕將誰從於戲千載一
遇古今之通言然全其始終者罕矣今卿善始
善終不亦美乎美和博學精擇善於著書故
宸翰及之所著有理學類編八卷群書備考十二
卷及元史節要行於世

吳伯宗名祐以字行撫州金谿人父儀元鄉貢
進士遭亂隱居教子伯宗十歲通舉子業先達

見其文嘆曰此兒玉光劍氣終不可掩洪武庚戌鄉薦舉首辛亥中書省會試名在前列及

廷對

高皇帝親製策問畧曰古者敷奏以言明試以功漢之賢良宋之制科得人爲盛今特延子大夫於廷不知古帝王敬天勤民其道何由歟伯宗條對稱

旨擢進士第一人時初開科取士得伯宗

高皇帝甚喜賜袍笏冠服擢禮部員外郎命與學士宋訥等同修日曆胡惟庸方用事欲人附已伯

宗性剛直不肯降屈惟庸每銜之八年惟庸中傷以事謫居鳳陽伯宗上書論時政因言惟庸專恣不法不宜獨任以事恐滋久爲

國大蠹辭甚剴切

上得其奏卽召還賜襲衣鈔錠奉使安南得馴象方物以歸

獻之除國子助教十二年命進講

東宮首陳正心誠意之說

皇太子嘉納明年改爲翰林典籍

御製十題命賦之伯宗援筆立就詞語俊潔

上嘉其才敏大加稱賞賜織錦衣十四年以爲太常寺丞辭不拜十五年又以爲國子司業掌監事又固辭不拜由是忤

旨貶陝西金縣教諭至淮安

召還以爲翰林檢討未幾拜武英殿大學士十六年冬弟仲寔爲三河知縣薦舉不以實伯宗爲所累復降爲翰林檢討十七年四月乙未坐文字進不以時謫雲南卒伯宗爲人溫厚詳雅博學能文然不苟媼阿故屢獲罪咎所著有南宮集使交集成均玉堂集

聶鉉字器之江西清江人洪武庚戌舉於鄉辛亥二月壬申會試中式是時

車駕將幸臨濠癸酉卽親策於廷甲戌臚傳進士名午門外鉉在三甲卽日謝恩趨

東宮聽注授寫職名爲九耜進而分拈之鉉得廣宗縣縣丞到官問父老曰民之疾苦何者爲劇對曰適歲旱蝗食乏役繁此爲劇鉉嘆曰民病而不上聞非所以事君也卽奏之於朝

上遣使視災傷悉蠲其稅民大悅秩滿入

覲上洪武聖德詩南京賦授翰林院待制以老疾

辭不許改國子助教時功臣子弟多在班列鉉
雍容誘導使就繩檢尋遷翰林典籍十三年四
月以老疾賜歸十八年召考會試得國學知名
之士甚衆

上大悅將復用之鉉固辭召問所欲以年齡益高求
便地乃授廬陵縣學教諭終其身有文集行世

祭酒胡儼先生文集序孔子曰有德者必有
言文者言之精也發於中暢於外達之天下後
世而不泯者必有其本也故國子助教清江聶
器之先生以和順之德孝友之行潔廉之操既
修之身而淑諸人矣又能推其底蘊發爲文章
以道志傳後非有本者能如是哉且其言優游
醇雅如雲行水流曠然悠然不爲怪奇而理趣
深遠讀者可以想見其人信乎有德者之言也

學士大夫昔從先生游者至今稱道之不絕口
此豈有要譽於人哉先生公與先生交最善
幼聞先公言先生嘗以春秋就堂試而虞文靖
公實較藝一時投業多場屋宿學之士文靖公
得先生之文獨真首選儼固識之則知先生之
文已煥耀於前輩者非一日也洪武初舉進士
授廣宗丞未幾入爲翰林待制助教國子日
顧問寵遇甚至既而告老得賜歸十八年復起
校藝春官遂授廬陵教諭優老鄉邑今先生歿
已久其子季順集錄平昔所爲詩文若干卷將
鏤版以傳屬錄爲序儼嘗獲親於先生間聞緒
論每竊自嘆碌碌無聞有媿先生尚敢序其文
乎雖然先生之流風餘韻在人者百歲如一日
雖欲不言烏得忘情耶故謹序之欲知先生者
庶有考焉

南離志卷第二十二

南廡志卷第二十三

列傳四

吳沉

錢寧

石光霽

李諡

陳南賓

王紳

徐善述

鄒濟

王達

鄒緝

蕭邦現

金礪

吳錫附

嚴祿

吳沉字澹仲金華蘭谿人父師道元禮部郎中
博涉羣書其爲文多尊信朱呂何王金許之學
沉嗜學有文克世其家累辟爲縣學訓導不就
洪武十二年十月郡以博學儒士舉至京師誤
上其名曰信仲旣除翰林國史院待制謂修撰

王釐曰名旣誤矣冒昧而不更是欺罔也釐以國法方嚴恐觸犯

天威固止沉沉不從毅然往吏部告請改正部以上聞

高皇帝喜曰是誠恪人也遂眷遇之十一月甲午朔上觀漢紀顧謂沉曰人君理財之道視國如家可也一家之內父子不異貲其父經營儲蓄未有不爲子計者父子而異貲家必隳矣君民猶父子也若損民以益君民衣食不給而君獨富豈有是理哉丁酉

上論持身保業之道又謂沉曰人當無所不謹事雖微而必慮行雖小而必防不慮於微終貽大患不防於小終虧大德謹小行而無已者則可以成大善忽細事而不戒者則必至於成大惡常人且然況人君乎沉對曰聖慮及此誠社稷永安之道

上曰安生於危危生於安安不克慮則能致危危而克慮則能致安在於能謹與否爾

上御奉天門視朝畢又謂沉曰人君治天下進賢納諫二者真切事也沉曰求之於古克行者鮮矣

是故亂日常多治日常少

上曰使其真知賢者能興其國何有不好真知諫者
在於忠已何有不納惟其知之不真是以於已
難入若誠能好賢則不待招來而賢者自至誠
能納諫則不待旌賞而諫者畢來沉曰

陛下之言及此國家興治之要也未幾奏對錯誤
降爲編修十三年六月乙亥復以爲待制甲申
復降編修沉薦教授童冀儒士吳慎遣使徵之
十四年冬十月辛酉給事中鄭相同奏言尊無
二上稱臣於東宮是竝所尊矣沉駁之曰

東宮國之大本所以繼

聖體承天位者也臣子尊敬之禮安得有異請凡啓事

東宮如舊制

上從之十五年三月復坐奏對失旨降渭源縣學教諭未行畱爲翰林典籍十一月戊午以爲東閣大學士十六年二月己丑沉進精誠錄先是

上將享

太廟致齋于武英殿召沉等謂之曰朕閱古昔聖賢書其垂訓立教大要有三曰敬天曰忠君曰孝

親君能敬天臣能忠君子能孝親則人道立矣
然其言散在經傳未易會其要領爾等宜類編
三事爲書至是書成

上覽而善之命沉撰序六月

上御謹身殿沉進講周書至國則罔有立政用儉人
上曰甚矣國家不可有小人有小入必敗君子故唐
虞任禹稷必去四凶魯用仲尼必誅正卯沉進
曰書言去邪勿疑所以深致其戒

上曰國家不幸有小人如人蓄毒藥不急去之必爲
身患小人巧於悅上忍於賊下人君若喜其順

已而恣其所爲將無所不至矣沉曰小人中懷
奸邪而其言甚似忠信不可不察

上曰然小人善於逢迎彼知人主所樂爲者不顧非
義乃牽合附會曰是不可不爲人主不樂爲者
不顧有益於國家亦牽合附會曰是不必爲此
誠國之賊也自古知人固難而知言亦不易也
八月丙戌以進講後期考功監劾其怠於職事
降侍書掾改爲國子博士是時文治大興沉獨
謂兵不可廢因言武經七書多依托之言惟司
馬法與孫吳爲可信昔者齊威王使其大夫追

論古司馬兵法附以田穰苴之說今所傳者非
齊之全書矣宜孫吳之盛行也聖人之兵昭文
德而威不軌者也所以生人也非殺人也禦亂
也非爲亂也尚義也非尚詐也孫子曰兵詭道
也吾恐非聖人意也間嘗以易詩書禮論孟諸
經詞義有涉於師征者輯而類之定爲五篇一
曰兵象二曰兵用三曰兵禮四曰兵詩五曰兵
訓總而題之曰六經師律其論兵禮尤爲確言
愚讀周官之書未嘗不嘆夫聖人之於兵政何其詳也蓋兵之設久矣唐虞之前不見於經而
唐虞之際則士師之官實掌之士刑官也兵有
刑之大者也古入所謂大刑用甲兵是也蠻夷

猾夏寇賊奸宄此豈象刑之所能盡服哉兵藏
於田賦徒衆主於司徒軍師之禮領於秩宗虞
則馬政之司而共工則軍械之所出也故兵雖
無專官而事初未嘗廢焉吁九官之兵刑合爲
一而六典之兵刑分爲二亦可以觀世道之變
矣且六官之制周官之所定也九伐之法旣專
委大司馬矣而五官之屬亦互相參領太宰統
衆職卽百揆之無不總也宗伯則秩宗而司空
卽共工也司寇雖不主兵而軍刑蒞戮則其任
焉平居則各司其司以聽上之命有事則各職
其職以趨上之令官非虛設而法非文具聖人
之經制纖悉如此哉且兵者將使之以殺人者
也聖人不取之於浮閑凶暴之徒而必取之於
勤苦稼穡之農夫使其爲農之日不知有兵之
害而爲兵之日不敢忘農之勞用之則驅之於
戍行不用則歸之於田里豈有後世招聚之害
供饋之費乎此則立法之最善者也然天下之
士不習則廢不祥之器豈可以常施於日用之
間乎無故而習兵是習殺人也故聖人又爲之
蒐狩之制因祭而田因田而閑申之以戰陳部

曲之法詔之以坐作進退之節以天子之尊而
逐取禽獸於草莽之野不以爲煩也天子之尊而
干戈之舞射御之方蓋自成童以及於壯其教
未嘗一日而廢也至於弓劍之獻矛戟之進亦
必謹其儀焉聖人之慮以爲平時授受之不謹
則當夫倉卒必有不善於用者矣王朝邦國之
中朝祭賓享之日上以射而擇士下以射而貢
士以考德行以觀威武是以當是之時公卿大
夫以及士庶其所以爲禦侮克敵之備無不能
焉他日用之民皆良兵而吏皆良將也嗚呼弓
矢斧鉞人情之所畏也田狩宴享人情之所悅
也先王以飾怒之具而爲飾喜之儀寓至險於
順動而伏天下之所畏於君臣之所共悅此則
其微意之所在也使夫天下之人而皆從容於
禮讓之域焉固聖人之所大願也不幸而用之
將以除殘夫暴而聖人之心亦必欲行之以道
殺人之中而有禮焉非古之聰明神武者何足
以與此乎惜夫有虞之禮不可得見而成周之
制度可考者僅若是而已先王之禮廢不能講
宜天下後世之爭馳於變詐之末而不自覺也

豈不可初沉家食時已草創是編及官成均乃
與諸生訂正以傳焉十九年七月丁丑以老疾
乞致仕許之遂卒沉富蓄遠覽志負經濟三進
三黜而無喜愠人以此多之

錢宰字子予紹興會稽人吳越武肅王鏐之後
博學能文洪武二年以儒士舉爲國子助教時
郡邑弟子員貢入太學者設爲教條限以歲月
責其成效助教與博士程其課業而升降之既
升舍乃得選登仕籍然士方畏懼爲法所繩惴
惴莫有樂學者宰爲人莊重和易諸生每就之

請益輒戀戀不能舍以是爲時明師十年三月
己卯朔以年老陳情乞休

上許之勅授文林郎國子博士致仕

勅曰朕昔戡定四方卽開學校延師儒俾助賢之
子弟凡民之俊秀莫不從學教之以經史六藝
明體適用布列中外以共保太平於無窮國子
學助教錢宰學問老成訓導有方在學數年綽
有成效朕方嘉諸生有所矜式而年滿七十懇
辭還鄉特授文林郎國子博士致仕爾尚師表
一鄉訓誘後進以裨治政庶幾不愧鄉大夫之

教則朕猶有望焉宰既歸精力猶壯宣

上德意有從之遊者輒開迪不倦遠近宗之二十七年四月

上觀蔡氏書傳象緯運行與朱子詩傳相悖其他註說與鄱陽鄒季友所論間有未安者遂

詔徵天下儒臣定正之於是太子太保兵部尚書唐鐸等舉宰及致仕編修張美和致仕助教靳觀等竝遣行人馳傳徵之是年四月至京師入見

上語以正定書傳之意命翰林學士劉三吾總其事

禮遇甚厚時建酒樓初成

賜宰等鈔宴其上人各需醉獻詩以謝

上覽之大悅復遣禮部尚書任亨泰

諭旨諸儒有年老願歸者先遣之宰齒最高與衆皆請留亨泰以聞

上喜曰朕知諸耆宿終能成朕志其善視之九月己酉書成賜名書傳會選命亨泰梓行之

賜宰等宴及鈔令馳傳歸其鄉又三年宰乃卒壽九十六初宰嘗病近代新聲太繁刻意古調擬漢魏而下諸作及古詩十九首且各補其未純

者詞林稱之所著有臨安集

石光霽字仲濂揚之泰州人少穎異讀書五行俱下元末翰林侍讀學士張以寧畱滯江淮光霽從之遊以寧博學善摘詞尤長於春秋嘗與大梁張氏訂定春秋經說而序之其畧曰春秋者聖人之心也生殺萬物天地之心無心也至仁焉耳矣賞罰萬世聖人之心無情也至公焉耳矣天地也聖人也惟聖人能知之能言之游夏且不能與而謂後之人若左氏若公穀氏能盡知且言之乎後之學焉者弗據經以說經顧

任傳以疑經噫其亦惑矣故以寧談經通融三
傳兼用啖趙光霽諦聽講解至忘寢食嘗書其
後聖經化工也傳之粹駁猶萬物雖有美惡皆
而元氣所鍾也自非物之美惡則化工不可得
也夫春秋以錯舉四時而名其義莫大乎春王
正月左氏曰春王正月周正月王周王也以見其爲
建子也春固周之時而謂夏時冠周月者非也
故公羊氏曰春者何歲之始也穀梁氏曰雖無
事必舉正月謹始也凡改正朔以爲歲始皆虛
以爲春春者歲始之定名也正朔以爲歲始皆虛
位也又奚建寅之拘哉微三傳則曲說行矣此
其所以爲得也乃若因正月書王而曰夫子之
作春秋將以黜周王魯變周之文從先代之質
則是義緣從先進行夏時而失之夫子之言一
則曰吾從周二則曰吾從周今而黜周王魯其
何以罪諸侯之僭亂者乎杜預矯其失乃曰春
秋者周公之志也周公之志仲尼從而明之然

周禮未泯化人足矣明爲而作春秋啖氏則曰
救周之弊革禮之薄也夫子蓋傷主威不行下
同列國故首王正以大一統先王人以黜諸侯
不書職以示莫敵稱天王以表無二尊是知雖
因舊史酌以聖心撥亂反正歸諸王道苟有過
惡用王法以正之故斷自平王之末托始隱公
所以拯薄俗勉善行救周之弊革禮之失也趙
氏則又以爲春秋因史制經以明王道其指大
要二端而已興常典也非常之事典禮所不及則裁
譏之是興常典也非常之事典禮所不及則裁
之聖心以定褒貶非權無以及之故曰可與適
道未可與立可與立未可與權是以游夏之徒
不能贊一辭然則聖人當機發斷以定厥中辨
惑質疑爲後王法何必從夏乎自啖趙之說一
出而三家之指歸互明故曰因萬物以見化工
甚矣傳說之不可盡廢也然而率文則違事泥
事則滯理曲生條例踳駁不倫其不能體聖人
大公之心亦已多矣是在夫人精擇之而已也
啖乎小知不及大知小年不及大年而豈以萬
物而能盡測化工之神哉此經說所以會通而

成一家之言也。以寧見而大嗟賞之。洪武十三年光霽

以明經舉爲國子學正。自常教外四方髦士多從之遊。戶外屢恒滿。十七年陞授春秋博士。作春秋鈎玄二十卷。以闡明聖經之旨。學者競傳習之。光霽感以寧授受恩義。旦夕不怠。時以寧沒已久。遺藁散落。光霽遣其子往維揚購得其詩百餘篇。捐俸梓行之。後以寧子炬貢入國學。以其文彙示光霽。光霽一見悲喜交集。復捐俸梓行焉。論者謂第子篤說如光霽者。世所罕見也。光霽亦工爲詩。每一篇出。學者輒詠諷。若膾

炙不厭云

光霽太學夜宿詩燭炬燒殘夜二更高齋蕭蕭爽客懷清山林只在虛簷外

錯把風聲作雨聲

李諒字叔方陝西藍田人元鄉貢進士世亂不仕洪武十八年應山林隱逸之召入覲時年七十矣

高皇帝見其言動甚重之授國子學錄教

親王駙馬誘掖啓迪之功居多三十一年以疾辭歸田里雅性嗜吟詠秦愍王嘗造其廬云諒嘗自贊曰壯歲端居暮年見舉應詔明光敬對天語所著有玉山樵隱詩藁

陳南賓名光裕以字行長沙茶陵人少讀書負
俊名而持行慤雅元末授全州學正因家焉洪
武二年六月應賢士聘至京師一時名儒如學
士張以寧輩皆折節與交除無棣縣丞轉膠州
同知所至以教化爲先南賓老成有文學以經
術飾吏事時稱醇儒十八年拜國子助教入見
高皇帝命之講洪範九疇反覆辨析意甚詳明
上大喜曰此天下善講書者也御書其姓名于殿柱
以褒之其敎國子尤善訓迪窮日授受無惰容
二十二年擢蜀府長史時

蜀獻王好學禮士於玉牒中最號賢王然南賓猶
隨事規諫王甚敬禮之造安車以賜復為構第
名安老堂學士劉三吾記之二十九年四川鄉
試應聘與漢中府學教授方希直同為主考官
所取皆名士論者稱明及卒年八十南賓作詩
清勁有法在蜀題詠最多蜀人傳誦之南賓詠
少陵草
堂詩西出秦關道路長岷峨東望鬱蒼蒼蓬萊
三賦舊無敵同谷七歌今可傷
琴布衾鐵衣雨淋淋浣花溪
上應回首千載令人憶草堂
王紳字仲縉金華義烏人父偉國初文行重海
內與宋濂齊名以翰林待制使雲南伏節死時

紳甫十三聰敏過人落筆爲文沛然不可禦鞠
于伯氏綬事母何盡孝及卒哀毀踰禮未幾綬
亦歿紳獨綜理生業筑筑憂患中而傑然負奇
志暇日益取經史百氏言覈其旨歸縱橫磅礴
出入上下宋濂一見卽器之曰王華川其有後
乎一時俊傑多自服不逮洪武二十五年

蜀獻王聞其賢馳書騁幣致之待以客禮俾教授
蜀郡紳痛父遺骸未返丘壠白其情事王憫之
給道里費以行至雲南訪求不獲遂卽死所奠
祭仰天號慟幾絕過者爲之泣下沾襟述滇南

慟哭記以著其志雲南布政使張統尤重之作弔王翰林文以紆其情既還王慰勞備至蜀人無貴賤咸知敬愛歲己卯

召爲國子博士遂入詞垣編摩

太祖實錄與侯城方希直交遊嘗尊希直爲百代儒宗勸之著書以淑來世希直不以爲然紳自是益嚮道德略文藝是歲夏四月紳以其父死節聞于

朝特贈翰林院學士奉議大夫諡文節開國以來文臣有諡者寔自禕始時吏部侍郎蹇義與時

浮沉紳上書責之曰執事方負天下重望治否安危固係於進退去取之是非也而所任非其所長所職非其所事位高於器則有覆餗之患才過於職則有積薪之譏非其才而強委之至於僨事則是執事欲爲尋常無聞之人而不可得況敢望其逸樂優游而與時俗上下乎義得書極憾之庚辰十二月丙午紳卒年四十有一有繼志齋集三十卷行于世子稔性至孝初紳痛念父沒每食必斥兼味稔一遵其志子孫相承閱數十年不變紳之教於家者其厚於彝倫

如此

徐善述字好古浙江天台人邃於經學且工爲詩以薦授桂陽州學正持身廉慎士子欽之秩滿陞國子監助教立簿籍以稽課業因鑒別其人之高下有犯小過而素行不疚者輒進言得免于罰以是諸生多競勸同官侯復性剛急善述婉曲諭之復自是忿戾消沮每遇善述曰我見公心輒懼如陶飲然何也自非賦性冲和何以至此因目爲今之叔度云

仁宗爲皇太子時簡入宮寮爲左春坊左司直郎每

作詩使善述指摘數過乃已多自書睿製以賜之善述亦盡心不懈於文事多所啓沃

仁宗每見聽納陞右贊善以疾卒于官爲人淳厚質實學識端正耿介恬靜不爲阿附

仁宗卽位追念輔導之良贈太子少師謚文肅命有司立祠墓側歲以春秋祭之

鄒濟字汝舟杭州錢塘人蚤喪父事母以孝稱天資穎敏好學彊記稍長遊縣庠材識爲同輩所服先達亦多重之餘杭令聘佐教縣學遂奉母徙家焉毅然以師道自任振起諸生皆趨於

學乃捐金一新學舍自令丞以下皆嚴敬之秩
滿陞中都國子學錄又陞國子助教一時爲師
者皆樂與交爲弟子者多樂就其講下濟亦力
學自輔太學稱明師焉無幾坐事自陳左遷西
安府學教授未赴改河間府學用薦者言陞平
度知州廉簡寬厚吏民安之丁母憂服闋用翰
林修撰李貫舉修實錄所司者官事撫要井井
有章書成

賜紗衣一襲表裏各四白金五十兩陞禮部儀制
司郎中時

朝廷祭祀冊拜慶賚及儀物制度徵舊章參古典
一資於濟

詔修永樂大典以五人總裁而濟預焉安南拒命
詔大將軍成國公朱能帥師征之擇朝臣有文學
者往司奏記濟承命以行軍事多所裨益安南
平踰年餘黨復貳王師再出濟亦繼往及還陞
廣東布政司右叅政務持大體而簡重寬平以
率郡邑嶺海之區政化行焉坐累左遷吏部郎
中數月擢左春坊左庶子在輔導之職善伺
上意言無不從寵遇特厚奉

令旨授皇孫經音亮氣和明於啓迪滿秩陞詹事
府少詹事爲人和易坦夷不見崖岸於物無所
忤自公卿下至武人庸隸皆樂親之其學長於
春秋教國子時受業者多傳其學爲文章不煩
思索舉筆率就嘗爲國子生劉瑛記孝友堂世
傳誦之記曰皇明繼天出治肇修人紀建國
紀元之初卽建國子學大選儒臣以典
教事旣而詔天下設學立師育材興化於今
五十年矣化育之所陶甄一道德同風俗文明
之盛比隆成周凡在涵煦之內莫不有孚顒若
劉瑛光薦全之清湘人先世廬陵望族其祖游
宦於全因占籍焉世以詩禮相承光薦由州庠
弟子員以書經領辛卯鄉薦禮闈不偶卒業成
均北選直春坊從事一日介寅友司諫張伯原

氏來見請曰英父母俱存兄弟無故深自慶幸
父復庵年踰耳順讀書尚志尤精軒岐之術弟
珣亦業儒好脩自惟早蒙樂育秀出常流家庭
之內融融怡怡承平之化遂倫理之樂嘗顏
其奉親之堂曰孝友將以爲家規且以示後也
願先生爲文教之辭不可以爲之言曰詩有之
民之秉彝好是懿德此天地之大經生民之常
性也氣稟之偏物欲之蔽於是鮮能全其固有
之性者必待夫君師之教而後有以復其本然
之善自世降風移五典必勅而後淳六行必書
而始備其再降也比屋鮮封於是舉彰善癉惡
之典而防範之又其甚也借櫻鋤而德色取箕
帚而諄語彝倫攸敷風靡波蕩自是厥後上有
願治之主時舉孝弟行義之士下有賢師帥能
以教化爲先務凡所以扶植綱常計也今光薦
生逢昭代蒙被神化知懿德之首莫先孝友
以是名其堂可謂知本也已書言君陳惟孝友
於兄弟詩言張仲孝友是皆當時之大臣然皆
不美其事功而以孝友稱之蓋以修身齊家爲
治國平天下之本也故曰其爲父子兄弟足法

而後民法之也光薦方將釋褐並仕學日益進
德日益懋懋以身爲教下之人寧有不樂從者哉
吾知其施於有政不難矣不但其後有所則效
也吾既嘉光薦之敦本而有關朝廷之治化
故喜談而樂道之光薦尚躬行力所居號願庵
踐毋徒美其稱則吾言爲有徵也客至必具酒
相與傾洽遇明徒之會山水之游輒欣然從之
不以事廢兼嗜老釋之學旁通深造雖其徒尊
信者鮮或過之年六十有八卒于官之日家無
餘貲惟藏書數千卷而已

仁宗卽位追念舊寮贈太子少保諡文敏命有司立
祠墓旁春秋致祭其子榦登進士官至禮部尚
書當給誥言于

朝加贈濟榮祿大夫太子太保

王達字達善常州無錫人世編氓至達始業儒家素貧嗜學不倦聰敏博聞考索精到爲文辭援筆立就不喜浮靡惟務篤實事親能盡子道閭里則之嘗受經於鄉先生張籌甚見器重後籌拜禮部尚書復往卒業京師學士宋濂見達端重簡默而丰儀卓偉嘆異其才折輩行以相交及歸而縣令辟爲鄉校師達訓迪有方學者多所造就改除大同府學訓導教如鄉校時革除年間以薦入爲國子助教六館諸生多趨其

門朝夕請益達誘掖開誨講說論議終日不懈

成德達材之士彬彬然出達門下其國學策題五道

人所行之道一也所治一也何以有忠質文之
異歟豈夏之時獨有忠而不貴夫忠與文也殷
之時獨有質而不貴夫忠與質也何三代所尚之不同
有文而不貴夫忠與質也何三代所尚之不同
也至孔子答顏淵為邦之問而又舉四代之禮
樂孟子答滕文公為國之問乃舉三代井田學
校告之又何聖賢所取不同若是也夫明經將
以致用也諸君子豈無致用之才者乎請陳之
以俟有司之采其二問孟子曰仁者無敵又曰
王不待大夫諸葛孔明之純一劉先主之仁厚
又何不得天下而亡歟先儒曰脩德以仁則天
命在我是豈孔明後主脩德仁之未至歟諸
君子博學多聞必有自然於胸中者請敷其說
其三問論語以學之一字為二十篇之首大學
亦然獨中庸以性道教為說孟子以仁義為言
聖賢相授心法一也何記事者之不同歟或別

有說然抑不知所謂學者何擊其四問蘇氏謂明
日久必有明於此者請聞其畧其四問蘇氏謂
漢高祖漢光武及唐太宗皆以不嗜殺人致天
下夫高祖起於亭長先武中興之主也太宗北
於晉陽太祖起於陳橋而為君也四君者得天
下實不同矣何蘇氏則而言機亦不知四君者去
其心同然異請陳君于格物之功必有明於得失
治亂之源者請陳以對其五問古者伏羲氏之
王天下也始畫八卦造書契以代結繩之此由
是文籍生焉以此觀之則先正稱焉雖天之
之君當矣何孔子則書而獨以求之而有異即
與伏義有不同幾何孔子求之而有異即
久請商確焉初

成祖居燕藩聞達名及即位召與語稱

旨太子少師姚廣孝復荐之遂入翰林為編脩時

方治革除年間奸惡

上問問建文君過失達對曰可與為善但輔導非人
故誤之耳

上不以為忤與脩

高皇帝實錄尋陞侍讀學士編纂永樂大典為總裁

兩知貢舉得士尤多嘗獻視學頌聖主親聖人作

而禮樂興大通行天子孫守作於前而南面
諸侯也武王未行天代一戎衣而天下定
拱手可以無事矣然武王出也通於所由始也
地也禮樂之也地大本所由出也通於所由始也
人心所由正也賢才所由生也萬世所由傳也
於是興學於辟廋而講學於禮樂重德基命
帝其故何邪誠以祖宗之德無以守
也然傳武王不立法以傳後世無以守
則祖述無以彰御天下者必若武王而後可守

人子孫者必若成康而後可三代以下道學
 樂不著禮樂不著民志固定逮漢高祖
 發迹于漢中而能以太牢祀孔下詔非禮
 樂之萃為萬世開太平者乎高祖知其然一
 之而天下大義顯遂致光武中興先降太學
 帝紹作片羅拜老漢家四百餘年天下皆本於
 茲所以作於前傳於後者如此鴻惟
 聖神文武欽明啓運後德成功統天大孝高皇
 帝卽位之初大典興辟廋尊禮孔子躬行釋菜崇
 化勳賢翕然大治爰至皇上繼述前志振
 起斯文用昭人紀誕顯天爵內撫諸夏外綏百
 蠻殊方別區罔不臣服大雅宏達而禮樂彬彬
 矣乃求樂丙戌三月初吉躬蒞太學釋菜先師
 備法物之駕盛清道之儀坐彝倫堂行養老之
 禮緇紳森列陳經析道禮樂明盛遠蹕成周乾
 璽坤符奠定四隅當斯辰也五曜呈祥萬象增
 煥斤斤其明以介繁祉豈但環橋門而望者哉
 於戲隆大本遵道統正人心興賢才傳萬世一
 視學而五義存焉臣達備職詞垣獲瞻明治曷
 敢默默俾
 聖天子宏謨丕烈弗昭著於億

萬年也哉謹敷五頌式敷
以間隆大本頌維木有抵維流有源赫赫大本
萬化基焉皇猷是闡人文以宣大昕鼓鼗萃此
多賢重熙累洽王道平平聖子神孫億萬斯
年尊道統頌煌煌與言曰精曰一湯武相傳建
中建極大哉尼父王振金聲道統斯繼集厥大
成稽首聖皇親臨辟靡師道用明萬世欽
崇正人心頌聖謨洋洋具在六經世遠言支八
心以疑我皇繼作芟繁去囂所起既一大道
斯昭光被四國萬乘親臨增輝聖德興
賢才頌於昭太學為賢士闢鼓舞有方咸能鑄
顏謫謫翹英雍雍茂才文明一照地闢天開
皇儀穆穆瑞日祥雲俊乂宅心以事一人傳萬
世頌三光宣精我安我成禮樂用彰萬邦以徵
崇禮斯道致治之源膺運會昌天地清焉佑我
聖祚翼我聖躬萬世相傳永樂無窮
達謙和恭慎為文章有典則援引證據必本於
六藝作詩有唐人風韻晚號耐軒又號天遊道

者有耐軒集天遊集詩書心法易經選注尚友
編桂林機要詩小序及梅花百詠詩藏于家達
性不飲酒甘嗜薄味然常苦氣疾時遇寒暑輒
發及卧疾篤

上命醫往視永樂五年六月卒年六十五
命有司歸其喪

鄒緝字仲熙江西吉水人自少力學博極羣書
爲文不尚彫繪洪武中以明經舉筮仕星子縣
學教諭革除年間用薦陞國子助教與博士王
紳友善皆能敦行以率諸生

成祖初卽位擢翰林侍講尋兼左春坊左中允國子
闕祭酒屢奉

命署監事末樂庚子北京行部鄉試偕侍講王英
爲考試官讐校精覈多得名士秩滿陞左庶子
仍兼侍講與修

太祖高皇帝實錄及末樂大典歲癸卯九月卒于京
邸緝居官勤慎小心北監初建緝署事多所建
明以文行受知于

成祖嘗患背疽

上特命中官督醫往療仍賜名藥每

朝廷有大事大疑緝務持正論與衆辨難不苟爲
異同與朋友交必輔引於正或淪患難必極力
濟之性澹泊自少不以貧窶累心祿食三十年
儉素不改布衣時其嗜學如饑渴之於飲食見
異書必露抄雪竄耽玩羣籍意裕如也及卒家
無餘貲惟書數千卷自號素庵祭酒陳敬宗素庵先生哀辭有
序左春坊左庶子兼翰林侍講素庵鄒先生仲
熙抱道蓄德博學能文廉介剛方守正不阿初
自呈子學官入朝爲國子助教陞翰林侍講
兼左春坊左中允而擢今職登華棧要餘二十
年出入禁庭小心愼密朝廷纂修國史與末
葉大典諸書先生筆削之功居多凡遇國事
盛事先生必有述作以稱頌功德使之鑒錫震
耀偉大光明而登之虞夏商周之上四方縉紳

求爲銘文詩詞必以得先生一言爲快京闈禮部集試天下多士亦必得先生主司文衡爲慶先生學行卓然爲當世所重如此然猶好學不倦益勵以勤不造古人之域不止是以年方五十有入竟以疾終初先生患癰疾甚危聖上憫焉遣醫療之而愈自後年就漸衰衆疾交攻而先生方有志於討論註述冀惠後學是以一室之內書藥雜陳參苓之條不廢檢錄焦心苦思養不濟勞遂用伏枕兼旬以成大故嗚呼其可哀也矣且先生爲士林之著龜後學之模範衆方屬望甚至而遽爾違之其爲可哀如何哉敬宗忝列門生自末樂甲申入翰林至于今未嘗與先生相離聽言論於左右觀道德之光華則所得於先生者多矣其爲可哀也尤甚是宜托諸文詞以泄其悲哀之思其詞曰嗟先生之碩學兮偉博古而通今擴高明之誠鑒兮蔚詞義之淮深觀洞庭與彭蠡兮歷廬阜之嶽峯飛千仞以覽德兮遂網翔乎禁林委衿佩之申申兮儼翼其儀容詠菁莪以樂育兮揚道化于辟雍負正氣而不撓兮信側目之寡從幸直諫

其有合兮後寵眷之愈隆既侍御於承明兮復
進講乎青宮匪堯舜其莫陳兮維姬孔之是崇
勤夙夜以修職兮懷小心之溫恭感眷遇以圖
報兮極頌稱之渢渢落東觀之攬觀兮煒國史
之煌煌諒直筆之有托兮又况擅筆三者之長
揭正道之大端兮舉國法之宏綱聳軒虞之上
兮又何必數乎漢唐成一代之盛典
今揚萬世之休光春賜資之孔厚兮金與僧之
是將登金步王俞廿年兮老冉冉其將至也周
情孔思日光而玉潔兮志倦倦其猶未也窮披
博覽益勤以勵兮致二豎之為厲也於是朝賦
錄乘虛以交襲兮夕夢孔氏之冥楹企曾參之
賈生之遭鵲兮夕夢孔氏之冥楹企曾參之
賈生之誦周詩之輒就達人世之明明兮從九
之真寘啓手足以全歸兮夫何愧乎此生嗟先
生負文學之淳正兮持操履之端莊謂仁者之
必有壽兮何造化之茫茫豈學篤而志苦兮乃
薄植而厚戕抑脩短之有數兮夜與旦之云常
辨籍籍其莫定兮緬彼蒼誰予訴也慨所作詩
古今之當然兮又何必深求其故也

清勁可法有素庵集藏于家

緝九日登欽天臺詩高臺千尺出城

頭佳節登臨散客愁六代江山餘勝跡萬家樓閣倚清秋石頭鴈斷西風急鍾阜雲寒落木稠黃菊欲開時已暮子循為翰林待詔宣德八年

當受

勅命循乃上疏自陳臣父緝先在翰林事

又皇帝後兼官春坊事

昭皇帝於東宮歷二十餘年而卒欽惟

皇帝陛下以孝治天下恩同天地凡推恩羣臣必寵

及父母

賜之誥勅顧臣二親早沒不獲生受

誥命之榮今臣秩卑於例不應得封贈伏乞矜憫
愚誠而特賜之臣不勝存沒感恩之至

上諭行在吏部尚書郭璉曰永樂八年

皇祖往征胡虜命朕居守北京時緝恒在左右所言
皆正蓋良臣也其特與之勿爲例

蕭邦現者吉安廬陵人少讀書不盡通父母責
之曰汝不勤苦書何由通顯親揚名無日矣邦
現泣拜受教於是夜則誦書日則聽講聞曾子
養志之說益思求所以養父母之志者惟在成
儒名盡子職而已凡先達有學行者必摳趨求

教焉久之學成得舉明經爲邑學訓導每得俸
給必製衣服備旨甘以奉父母扁其堂曰養志
昭事親也革除年間晉國子監典簿時博士王
紳以純孝聞邦現恒往聽其言論焉每得紳一
言輒識之不忘見諸生有三年省祭及爲養親
而行者必委曲成就之有不顧父母之養者邦
現每呵責之其趨向類此祭酒張顯宗司業張
智禮重之亟稱其孝云名公鉅卿詞翰爲養志
而作者類爲卷冊以勗其家族學者稱爲
養志先生

金礪字汝用杭州仁和人洪武末以鄉薦高等
登乙榜授教職九年秩滿當陞需此久之未樂
庚辰始擢國子典籍時四方書版多送京師
詔寘諸太學無所於儲礪慮其敝乃聚米簞爲蓬
屋中置架以庋焉旦夕謹視隨闕輒補有刊印
者使人去其凝積毋致漬敗故梓刻得傳至于
今者礪之功也大學士楊士奇雅重之礪爲典
籍九年秩又滿乃書最以去士奇爲文以贈焉
大學士楊士奇送金典籍序天下之事有本末
惟明達知務者有以識其輕重緩急而致力焉
天地萬物之理往古成敗之故凡聖賢之所以
爲訓具在經史百氏之書上而國家資之以出

治成化下而士君子資之以成德廣材皆不可
賢才詔經史百氏之書咸聚焉時四方書版上
京師者悉藏太學宣典藉司之同之有官而求
之無禁蓋京師天下之會太學賢士之會經籍
賢士之所資而資士者治平之資也 聖明

之意深遠矣余居京師二十年往還太學其典
籍蓋獨見錢塘金礦汝用之敬於其職也旦暮
謹視孜孜修壞補闕愈久而愈勤夫官無崇卑
盡職為賢汝用其賢乎士膺一命典一職則必
盡其所當為乘田委吏聖人猶盡心焉況經籍
所係之重哉汝用發身利日累任敎官於持身
及人皆有賢譽庶其明達知務者矣今滿三考
書最以去中書舍人張洞左春坊司諫王榮翰
林庶吉士陳鏞重同鄉之誼求既歸省先墓及
贈以言余言蓋非其鄉之私也
復任又久之乃得陞助教恬靜安職絕無外慕
人以爲賢云同時吳錫字用庶撫州金谿人祖

母周守節不二時以孝節稱學士劉三吾爲之
立傳錫九歲不能行而警敏嗜學以薦授國子
學錄時醴泉出神樂觀上孝感詩

賜乘傳還職所著有時雨集胄監長編屬爲錫序
而行之

嚴祿字伯宜衢州開化人自少好學師事從兄
好禮好禮官思恩臨汾建平不憚險遠率往從
之學旣成有司薦上銓部洪武中除太僕羣牧
官三歲罷羣牧改國子監掌饌晨夕會饌祿執
事惟謹簿正器皿分屬膳夫具有條緒應用弗

失以是雖千百人萃七箸絕無譁者自祭酒至
六館之士皆譽之故其才名以剴劇聞末樂初
用薦陞閩縣知縣縣在會府臨其上者貴重且
衆而

朝命之使及海南諸蕃國貢獻往來宿頓供億之
繁應接趨走無寧斯須祿從容應辦如在掌饌
時事集而民不擾閩賦舊十倍他邑民不克堪
祿力言於府平其賦民至于今賴之歲庚寅改
知黟縣愛民如閩尤篤意於興學民甚嚮服無
幾卒於官祿天性孝友養孤姪如己子處族姻

閭里汲汲義舉及爲政益著賢聲焉子珊乙未
進士翰林庶吉士授刑部主事贈祿如其官云

南廬志卷第二十三

南離志卷第二十四

列傳六

張顯

羅師程

宋琮

王讓

孫貞

周岐鳳

莊觀

李奎

趙魯

陳旅

羅用俊

李崇光

張顯字緝熙江西奉新人自幼岐嶷不羣性識
穎敏從教諭張克靜受尚書得其指歸才譽日
振洪武中被薦除縣學訓導謁選于京師適有
詔選儒者教武臣子弟吏部乃舉顯等十人應
命未幾擢靖江王府教授尋以外艱去職歲壬午
內難平復選入中秘與修

高皇帝實錄永樂初書成有白金文綺襲未之賜陞
國子學正丙戌三月朔

上幸太學舍菜禮成

御筵命講宴賚師儒顯亦獲與焉辛卯秩滿陞國
子監丞蒞事公勤六館皆敬重之乃條陳百務
曲盡物情而成法益備時北監初建惟司業貝
泰署印教尼不行戊戌朝議以顯素諳典章乃
奏改北

詔報可遂兼程以往惓惓經理學舍勸懲淑慝百
廢畢興裨輔泰所不逮泰舊嘗爲南監助教顯

降意下之且與六堂師儒協恭和衷嚴申學規
激勵後進於是諸生數千人肅然敬服莫不以
顯為能盡職癸卯五月卒于官年六十兩京人
士多追思其公正無不盡傷大學士楊士奇輩
相與作詩哭之楊士奇詞三首其一八品儒官
坐辟麻白頭心事幾人同至今
鼓篋橋門者聖淚相忘至公共二兩京學省
聚賢英試問何人不負聖官舍一飽清似水後
來相繼屬誰能共三死去悲吟滿紹紳共嗟直
道不憂貧不知駟馬高車客身後如公有幾人
顯嘗自以行已直率別號惓叟故名其所為詩
文曰惓叟藁藏于家

羅師程名恢以字行吉安永豐人六世祖武岡

教授開禮末季勤王死節世以儒業承家師程
幼穎敏五歲失恃既中力學居父喪哀毀骨立
襄事惟謹事兄如父敬愛篤至鄉里化之洪武
癸酉薦授撫州崇仁縣學訓導嚴師弟子禮勤
於誘迪凡經造就者悉得爲聞人嘗上疏言孔
子廟庭從祀當以道學論當時有若優於宰予
論語記有若言行者四皆有裨於世教記宰予
者亦四皆見責於聖人宜以有若居十哲位次
而宰予居兩廡公伯寮沮壞聖門不宜從祀遽
伯玉孔子之故人行年六十而化今居兩廡六

十位次之下於義未當宜陞啓聖王廟疏奏不
報其持論正大多類此秩滿膺薦入史館兼校
國學經籍兩與纂修

高皇帝實錄求樂初竣事賜白金文綺陞國子學錄
師範端嚴前後受業者千餘人

成祖視太學賜襲衣預筵宴滿考遷博士又六載以
年七十陳乞致事時

車駕巡幸北京

仁廟在東宮監國朝臣封事率未敢請特爲遣使上
聞得旨俞允時論高之司業吳溥嘗遊其門率六

館師生數千人祖送之觀者填道時人莫不美其榮師程德性忠厚儀矩端莊望者敬畏孝於奉先遇忌辰時祭輒感愴泣下誠於接物於人無疎戚長幼言談表裏如一旣歸絕迹城府日與親朋登臨觴詠而詩書之訓考索之勤未嘗少廢掇拾先世遺文訂輯族譜梓刻以傳於家事澹然弗顧也一日忽召子孫語之曰吾覺神不守舍其將逝乎時天初曙啓戶視之有頃卒年八十二自號雪庵有寫心歸田諸藁藏于家宋琮字萬鍾吉安泰和人天資純恪悟性不逾

中人而勤苦攻書以是學日充博爲邑學弟子
試必首列以周易魁鄉薦洪武丁丑中禮闈第
一賜進士出身又在高等人以爲顯庸可俯拾
矣琮明於易數謂其同進諸士曰旬月間翰林
多罪僇琮其竄乎人初不之信也是科西北人
士無一登第者乃訐奏試官學士劉三吾等徇
私不公三月二十一日有

旨覆考會試下第文字三吾及贊善王俊華司憲
侍讀張信暨琮同年修撰陳郊編修劉諤皆寘
于法琮以三吾首舉連坐安置威虜衛其精驗

如此琮自竄後益窮經博覽動無怨尤人以樂
天知命高之求樂初經赦還家久之被薦起爲
刑部檢校時修撰梁潛文名擅一時於詞林最
鮮許可獨謂琮詩文經義雄峻不羣每稱揚之
乙未會試以琮充同考試官校閱所得皆名士
或欲薦琮入翰林琮辭曰眩詞藻以躐華要此
賈禍之端也竟不肯以名上時同鄉楊士奇輩
方以侍從用事莫不重其恬退洪熙元年琮以
秩滿擢國子助教其訓迪以敬爲主凡講誦有
舉止傾敬者必呵責之諸生見者凜然畏服宣

德八年秋又滿乃陞翰林檢討仍管助教事居
四載引年致仕去家居筋力漸衰晨必冠帶詣
祠堂肅揖朔望必造先塋拜掃鄉黨宗族相過
劇談竟日未嘗以耄疾辭其力行孝友如此琮
自知死期人或以休咎叩之輒不應卒時年七
十六

王讓字宗禮山東益都人幼勤敏端恪讀書日
積寸馳聲庠序間事親有孝行嘗廬墓致涌泉
之應洪武末由鄉薦授國子學錄施教以孝爲
先文藝書翰皆在所畧諸生有以懼艱告者讓

一聞涕淚輒泫泫下以故多所感化永樂十年

八月癸酉

文皇帝特簡侍

皇太孫讀書謂侍臣曰孝者百行之源也君子之所當則也故詩曰有孝有德朕聞讓孝於其親故擢用之讓在講筵首陳堯舜之道惟在孝弟人主躬行孝弟則天下感化不勞而治每談經必端凝拱立敷宣明暢

皇太孫敬而愛之時同事之臣陳山張瑛以順旨被寵戴綸林長懋則強諫不少詭隨惟讓謙卑

自牧簡默寡言每進規諷亦委曲切中事情

皇太孫斂容聽之益加禮重及扈從北行常被
召見厚加賜予十八年九月甘泉縣學教諭張昱
東阿縣學教諭韓岫末年縣學教諭劉順皆被
簡擢爲國子博士侍

皇太孫讀書讓雖先進以官序折節下之意每恬
如也二十二年始陞北監助教洪熙初
皇太孫正位東宮讓進左春坊庶子未幾

東宮卽位是爲

宣宗章皇帝宣德改元以輔導功首陞讓爲吏部右

侍郎山瑛及綸等皆居其次時讓同官黃宗載
負才學尚氣樂讓每退遜宗載遂和來交好日
密居部二載卒于官時年七十四讓言若不出
諸口而禔身素履人所不及荐歷榮顯恭儉若
布衣時爲

上簡注未嘗矜耀忠亮清介始終如一日士林重之
孫貞字宗正南昌豐城人先世有鞠于母姨夫
李氏者遂冒李姓至貞始復焉貞穎異力學爲
縣庠生時教諭劉子彥深器重之授以毛詩又
從鄉先輩學士朱善進士黃德潤游益有造詣

洪武辛未貢充國子中癸酉鄉試甲戌登副榜者百六十餘人

詔三等銓之貞得教授紹興

高皇帝進諸上等者近陞前諭以教郡之道且命吏部錄其名以俟擢用貞銳然思副

上旨至官卽振教規務行公正有施御史者按郡甚嚴私於給傳徐氏子旣令充增廣生又升而廩膳之貞諍不可御史氣爲沮郡官皆從旁私語使姑許之退可改行勿與面質貞曰君子與人以信焉有今日許之而明日可改御史知不可

奪遂止其作育諸生旦夕講解不倦一日遇相
者言貞將有憂至貞卽心動求歸省親行次南
昌而父已訃聞矣居喪哀毀踰禮服闋調漢陽
時科目久乏貞教之尤力後當賓興赴試者十
二人惟一人下第及奏教績爲諸郡最府有張
通判以廉介稱坐事繫獄都臺獄吏索賄不得
多所挫抑事白復官人疑其必易所守而張廉
介自若會

詔下教授得薦賢貞卽舉張遂擢按察僉事張貧
甚無所於裝貞卽資之行未幾紀元貞秩滿陞

國子助教嘗謂學須以靜為本因立家教以示

法於是閤其燕居之所閉諸子其上親授以經

諸生效之多成材者時博士黃彥清與貞連居

因熟其從子金蘭後彥清以姦黨沒家

王午建文園宮

自焚彥清在駙馬梅殷軍中聞建文已沒私諡曰昭仁恭義孝愍是年詔討姦黨彥清坐罪伏誅後殷入朝力辯彥清初不在軍中其家乃釋金蘭為貴池典史坐累

至京失所歸貞館之三年有不足輒周之或傳

言將罪彥清鄰佑又譖將罪金蘭宿主貞皆恬

不為動

初建彥清九族將誅及金蘭以梅殷力辯得免惟罪彥清于孫金蘭後遷貴池

知縣事見劉忠愍文集同鄉楊伯震為長蘆運

及周功敘學士石溪葉

副得罪自獄中出病疫無復人色昇至貞門欲
托寓焉旁舍懼其相染也唆家人固卻之伯震
遂露卧祠下貞歸聞之嘆曰人各有命病豈能
染邪亟命移入病卒以愈其好義多此類也助
教考最轉博士陞從七品祿時太學官屬傑然
著賢稱者不過四五人輿論推貞爲之冠祭酒
胡儼司業吳溥重其文行竝遣子受業貞嘗署
監事監生在歷有事故不在官者所司移文問
狀六館紛然莫知至經旬不得報貞乃作類姓
簿各錄姓名籍貫班次欲求其人索姓下卽得

之監中稱便遂爲定法署事一年而解得

勅命授修職佐郎時子曰良爲御史同居每夕歸必問今日治何獄當則喜有不當輒切責之以是竟能其官曰恭爲翰林編修分月俸致養卒不入升斗爲己費壽以欽賜銀幣不發封輒還之而報以書曰我俸恒足爾宜自養爾廉勿復致也曰儉曰讓亦爲教職初欲五子各專一經尋以長子曰溫有桑梓之托取外甥鄔在恭以足之其後四子皆有成在恭亦第進士爲御史當時稱善教者必曰孫博士孫博士云宣德初

奏乞歸省其母時母年八十貞亦近耆矣始有
退休之志明年還任又明年秩滿詣行在請老
不允尋以曰恭官封致仕歸養朝夕娛侍親側
不舍非

國慶及鄉飲酒足不至縣門諸省聘典鄉試文衡
皆辭不赴及丁母憂築館敷山之下鄉子弟多
從之遊後三年曰讓在祁門迎養又二年曰良
出守重慶復迎養貞皆樂赴之及歸自重慶嘗
謂人曰人生貴考終命耳壽雖期願而苦疾篤
非福也願逝時恬如睡夢於我良快正統五年

五月果無疾而卒年七十有五貞存心端謹自奉儉約揆事必慮始終故歷官四十餘年夷坦如一初爲國子生時與郡人盧淵同舍及寫武臣誥與主事夏原吉同事教紹興時與郡守李慶相善後淵至侍郎原吉慶至尚書貞未嘗一至其門其自守如此先是卒前數月寄書曰恭言其得病近稍差而四體未寧曰恭亦心動懇乞歸省及俞允奉

命行至南昌哭貞計如貞昔哭其親焉人皆異之貞所著有竹齋文集

周岐鳳名鳴以字行江西吉水人其先應龍宋
紹定進士爲時名儒其子京孫直寶謨閣以言
詆賈似道棄官去曰聞孫元末以明經領鄉薦
薦入史館修三史上書請以宋爲正統不合而
去終鰲溪真文書院山長卽岐鳳祖也故其家
有世直堂焉岐鳳性敏嗜學才識高邁襟度弘
達言論侃侃如也洪武甲戌以經明行修薦爲
桐城縣學訓導嚴立教條勸勵有方登科入仕
者踵相繼後以外艱去服闋擢卽墨主簿優於
爲政藩司因遣之同御史僉事往登州讞強盜

獄盜七十人而稱屈者逾半御史執不與辯岐
鳳廉知其爲宿怨誣指力言之御史感悟出其
四十五人舉郡稱明會兵興賦民出鐵七十餘
萬以資軍需岐鳳奏言鐵非所產請出庫中積
鐵以抵用又令民輸豆軍前准其歲糧已而復
徵糧俾以鈔償豆岐鳳復奏請從初令以信於
民且連奏便民十餘事

朝廷皆納其言民甚德之坐累赦免民涕泣遠送
而別未幾甲申徵授國子學正明年

成祖視學預筵宴襲衣之賜未幾擢漢府紀善時漢

王高煦自負靖難戰功私蓄壯士三千不由兵

部籍發且據諸衛草場所為多不法岐鳳每諫

面從而心思之嘗開寶賢堂以延問群臣實欲

招匪人為異謀也岐鳳心知之作堂箴以諷

曰鴻濛肇判三才是分生民之中惟君獨尊君

法于天乾健而運春生秋殺履信思順王國事

君奉承于內畏天安命固有或恃伊昔有周封

建惟庶時有仁賢法家拂士曰仁惟何行義與

道曰賢惟何忠直是實人君寶賢安分樂職動止攸

賜時順天地儲祥王國寶賢賢則亡用舍進退惟

寧福履綴吉得賢則昌失賢則亡子小人薰蕕相

否惟臧寶賢之實易由而知君子小人行利澤當時斯
隨忠言逆耳拯理無違致之于行利澤當時斯
實為寶勿嫌勿疑好言悅耳宜盡作德一或聽
信作我蠹賊遠之不亟投間而入此親而離彼
疏乃戚毫髮不謹追悔曷益敬惟賢王兼資文

武愛相敬兄厥初所賦親賢好仁風心所慕翁
自謙讓求言如遺進臣左右教之誨之服古哲
王秉志靡虧河間東平寢寐見而臣非古道則
不敢陳知善當進進則上仁知德難於臻無日
新深養元化與道爲體息心止幾神完氣銳動
而有悔勿動爲貴靜而可嘉惟靜弗替動靜適
道過易由致安富尊榮與國咸休光昭史冊往
哲同流實賢之箴臣言之忒作我功範以昭明
德高煦益忌之會駕北巡高煦擁重兵出入岐
鳳請守藩臣禮高煦大怒翌日令衛士詬之岐
鳳訴焉惟今質於儀衛司已而獨送岐鳳于朝
下錦衣獄欲寘諸重辟時

昭皇帝在東宮監國察知因諫忤王無他咎乃降長
洲縣學教諭施教如桐城時三爲閩浙鄉試考

官秩滿赴行在陞國子博士及至南京

昭皇帝召見于文華殿慰諭甚至且期以大用尋丁繼母憂服除用薦陞兵部職方員外郎時方清理戎籍而職方事尤劇岐鳳剖析無滯僚案服其能三載考最

賜誥命授奉直大夫贈考妣如制宣德元年八月高煦舉兵反尋就擒或謂岐鳳諫諍功如曲突徙薪當首論賞然竟不之及也八年以引年致仕正統三年四月卒年七十五岐鳳爲人孝友嫺睦急於濟人甫十歲喪母哀毀不自勝見者

稱嘆筮仕桐城卽迎父就養及奉父柩歸至小
孤風大作舟將覆仰天而號風隨以定合三從
之親爲一爨人近千指服用皆有常度著家範
十數條以示子孫嘗遇清江艾時春赴任寧海
道爲寇所掠且被創傷重岐鳳求藥治療迄愈
則資贐其行其尚義類如此所著有尚書通春
秋纂要及退齋藁六十卷藏于家子叙官至翰
林侍講學士以文行世其家官三十年竟不顯
庸人謂有父風致云

莊觀字居正徽州歙縣人自少英敏篤學制行

不苟永樂中領鄉薦高等授浙江義烏縣學訓導陞湖廣辰溪縣學教諭宣德五年以教績陞國子學正所至皆以身教不特經學而已正統改元

朝廷選學行老成之臣專董學政特拜陝西按察僉事奉璽書以行觀爲人剛正陳臬詳慎提調有方學政修舉巡歷所至士類皆頌之遂進本司副使董學如故觀持廉秉公始終一致關中士風爲之不變考最

誥命褒顯後以老致仕卒于家所著有貞庵集觀

之在太學也祭酒陳敬宗性嚴峻於官屬罕所稱許獨器重觀曰文行兼備他日

國家名臣也未幾果膺薦持憲有名都御史四明張楷亦稱其有明理屬詞之學成已成物之道篤行孝悌之德君子人也子歙登進士累官雲南按察使父子俱爲憲臣世有清德家風儒素始終一日其賢於人遠矣

李奎字文明廣信弋陽人自少端重淳粹博通經史永樂辛卯膺薦于鄉爲廣昌縣學教諭以考績奏最遷國子監學錄以溫厚化導多士日

夕觀覽六經百氏之言作爲文章詩歌汪洋浩
瀚溫厚典則祭酒陳敬宗見之嘖嘖賞異曰一
代傑作也正統戊午被薦試都堂擢監察御史
慨然以澄清沙汰爲己任裁斷一切事情引經
援史高出世俗人咸遜以爲不可及嘗奉

命巡歷浙江時戶部侍郎王濬在浙督運頗失紀
律奎卽劾奏罷之已而巡歷蘇松諸郡奸贓官
吏莫不驚動曰此刻罷王侍郎者也皆望風求
解去尋陞大理寺丞巡撫河南時流民聚衆賴
之以安考績遷右少卿巡撫畿內諸郡所至奸

弊肅清未幾致仕卒奎居官廉潔優於文學屢上章疏切於時政一時士大夫咸推重焉有文集二十卷藏于家子玘登進士第亦繼武爲監察御史終陝西按察副使克振憲紀有父風烈趙魯字尚確紹興山陰人明尚書宣德初膺鄉薦名在高等歷任教諭秩滿不調恬靜自如人服其不阿正統十二年乃陞國子典籍日端坐觀書詠詩校對梓刻訛缺或忘寢食倦則鳴琴自娛祭酒陳敬宗謂人曰趙尚確仕不近利學不近名對之坐談簡淡有味令人興起今之黃

叔度也

敬宗寄趙魯詩充棟群書萬玉林縱觀

花奏綠琴但學古人敦素履不同時俗論

浮沉公餘最是怡情處青鳥時時送好音

久之

遷典簿益勤敏盡職不以爲卑及秩又滿引年致仕行李無一長物惟囊書數百卷而去

陳旅字正初台州臨海人父瑒以詩經發解南省俱爲首冠歷翰林檢討提學江西廣西終按察司僉事清節粹學師表一方旅承家學以明經舉爲江西新淦縣訓導廉以律已公以率人鄉賢有死節爲人所諱者首題其名于碑以示勸貂璫之子欲進學則力遏之暇則修治學宮

規益縣政上下交誦其賢滿考書最擢翰林孔
目未上以憂歸服闋改國子學錄操履一如在
新淦時雖無所事事而賢聲隱然出六館右乃
遷監丞監丞職雖卑而權則重監之紀綱自祭
酒而下得參預焉旅乃首黜公廨遺財力清曠
所宿弊律已率人益嚴而厲甚至貴戚謝過監
規爲之肅然未幾又以憂歸起復改南京國學
六館之士素聞其清強望而畏之曰陳監丞來
矣及署堂印遂奏請修理廟學甯路惡其敢爲
以疏有舛誤罪之然其事終不能寢旅於是盡

出羨餘以資公費一無所私輸粟監生與外夷
遣子入學者例皆厚贄旅亦一無所取顧於寮
友生徒之孤貧患難者則周給之不吝几載秩
滿卽乞休致諸生請于

朝願再借畱旅不待報已翩然東歸歸十載乃卒
年八十有一旅性峭厲剛直才氣英發議論慷
慨視世之人若無當其意者然貞不絕俗惠能
及物去任三年祭酒謝鐸泣監事諸生故吏猶
稱道旅不絕口曰安得復有陳監丞云時繼旅
者已非其人故也

羅用俊字舜臣吉安泰和人自少遜志力學明
於尚書天順己卯領鄉薦高等人以甲科期之
庚辰中副榜當就教官時年二十三於例得辭
用俊輒受職遂除浙江青田縣學教諭九年秩
滿以成績陞安慶府學教授九年秩滿又以績
告成化乙巳乃陞南監學正又九年秩滿弘治
乙卯陞北監助教爲人孝友嚴正重義輕利所
至以身爲教士敬信之去則立主祀于名宦祠
在南監日久模範端重公卿大夫咸加尊禮不
獨諸生而已其庭訓以嚴濟慈致三子皆登進

士顯名天下人比之河東三鳳年六十致仕去

大學士李東陽送國子助教羅君致仕序泰和
羅君舜臣舉天順己卯鄉貢有聲場屋間明年
庚辰上禮部得乙榜乙榜之士例年二十五而
上不得辭教官君時年甫二十三輒拜青田縣
學教諭青田舊乏科目而教諭例必舉二人乃
得陞秩君所教士連得舉九年以成績告擢安
慶府學教授教授所舉例必得四人而安慶士
亦不恒有君又以疾告乃內遷國監歷兩京典
命以至今官時其子欽順進士及第為翰林編
修同在朝籍居京第不數月其其次子欽德欽
忠又同舉于鄉薦書至君曰吾可以休即上疏
乞致仕致仕例以七十為限君之年僅六十耳
夫取之廉者其子必輕進之難者其退必易觀
人之始可以知其終也今之仕者苟有所避或
減年以幸其免苟有所覲或減年以幸其出充
其念自少至老而不能變蓋患者未有不患失
焉者也乃或矯情制欲有所飾而為之而日改
月易消鍊委靡以終于不自振者亦多矣如君

之廉取易退傾始而保終者幾人哉且官之貴
任者雖小大輕重而人之才力亦不同彼汲汲於
進者雖其力有所不勝猶彊勉負荷至于顛蹶
債敗終無益乎其身而後已其有謙抑歛括寧
使吾之有餘而不使人以我爲不足竟以成其
功而保其終如君者又孰得而孰失邪況君子
之道將以成物物不能以必成必吾之時與地
有所得爲而後可遂其所以必成爲者弗與也君
由邑及郡隨所得教皆能竭心力著功效則其
去也不可謂非成功而退亦豈忽於恒事以爲
簡果於肥遯以爲高者可例論哉然則君之賢
其可以觀矣予考禮部得欽順之文奇其才及
在翰林之賢而未始見也君之行與其于同官
者編修徐舜和送之國門而請予以辭故書之
後以子貴累封通議大夫南京吏部右侍郎杜
門却掃好學不倦卒年八十七歸間者蓋二十
八年計聞

御賜祭葬

李崇光字宗顯陝西高陵人少爲邑學生貢入太學正德庚午授南京國子監典籍事父母能色養得其歡心父疾親嘗湯藥侍臥其側晝夜不解帶既殯猶寢苦客顏枯槁其事母疾猶事父也嘗作塋域築堵環之種樹百章羅列成行又嘗代諸兄講屋及爲典籍又以其俸貲作服具畀諸兄

國朝典籍書板多在南監縉紳置籍者印千紙例輸白金五分於典籍以爲常崇光辭弗受祭酒

司業咸嘉之以疾卒於官

歐陸若英倫大學率閱數百年吾國南北都大學財
數十年瞠乎後矣第就南都論孫吳以來已有國學
至隋始夷為郡縣黌序積弛而朱明之國子監尤極
養士之盛自成賢街抵欽天山遺址章灼今中央大
學暨考試院皆在故明廟學界中風徽相續未邈也
清人多薄明制又不詳究其史籍往予嘗為五百年
前南京之國立大學一文布之學衡雜誌某公詫為
昔所未聞而學者乃稍知十四五紀時吾國辟雍
造士之規模遠過于巴黎倫敦諸學校也明代學制
故在明史選舉志中兩京太學亦均有專志然北雍

實仿南監成弘以降偏重科舉教澤陵遲衰微矣黃氏南雍志詳載洪武永樂興學事實言教育史者宜胝沫之乃有以見大易所謂教思無窮容保民無疆者明祖有焉其源則自虞夏商周成均東序西廡瞽宗明堂漢魏吳晉南北朝隋唐兩宋太學演蛻而來炳焉為東亞文教宗主非夫皮傳耳食櫛鄰裔而拾滓緒自尋其國族文化者倫也黃書梗概見四庫提要及朱氏讀書志丁氏藏書志不具述云吾印布是書之怕辛未穀雨柳詒徵